



रूथमी सिला बाला माल्दीशो

रूथ

ब्रेक्ब मुर: साइ डा टाल्मुत माइश्शो किताबमी “एको किताब ब्रेक्ब सामुएल बाक्ब” दे ब्रेक्शो बाक्ब।

गेना ब्रेक्शो: दाऊद आ सासन पची ना ब्रेक्शो बाक्ब। मेको आ सासन ११०४-६६५ बि. सी.म बाक्शो बाक्त।

मार ब्रेक्शो: एको किताब डा लोव्र परमप्रभु यावेमी आ वोंइश बेक्शो मीश मुर नु रोम रोइक्च आन कली शिशी पशो सांकछी बाक्ब। रूथ मोआबी दुम्शा यो परमप्रभु यावे कली थमा सुइक्ब दुम्त। मेकोमी बोआज नु ग्युंवे पा येसु आ किकी पिपी दुम्त। मती १:५

नाओमी नु आ खिं डा मुर

१ निसाफ पाइबपुकीमी इस्राएली आन कली हुकुम पची ना, अन्काल दुम्माक्त। मोपतीके यहूदा रागी डा बेथलेहेम रे मुर का, आ मीश नु आ तौ निक्शी लाइश्शा, मोआबी आन रागीम बाक्थ लमाक्त। गन्ती २५:१-५; १सामुएल २२:३-४ २मेको

मुर आ नें एलीमेलेक बाक्माक्त। आ मीश आ नें नाओमी नु आ तौ निक्शी आस नें का के माहलोन, का के किल्योन बाक्माक्त। मेकोपुकी यहूदा रागी डा बेथलेहेम एफ्राथाह सहरम बाक्शो बाक्मा बाक्त। मिनु मोआबी आन रागी जाक्दीश्शा, मेक उइ बाक्मा बाक्त। उत्पती ४८:७; मीका ५:१ ३मिनु नाओमी आ वोंइश एलीमेलेक

बेक्शा, नाओमी नु आ तौ निक्शी प्रोंडचा पुंडसमा बाक्त। *ब्यवस्था ७:३; ब्यवस्था २३:४; नेहेम्याह १३:२३* ४मिनु मेको आ तौ निक्शीमी मोआबी मीश आल चाक्से बाक्त। का आ नें ओरपा, का आ नें रूथ बाक्माक्त। मेकोपुकी मेकेर १० बर्स बाक्मा बाक्त। ५मिनु माहलोन नु किल्योन निम्फा बेक्सा बाक्त। मोपा आ वोंडश नु आ तौ निम्फा बेक्शा, नाओमी ला लीमाक्त।

रूथ नु आ शिमी

६मिनु नोले नाओमी आ चाइमी निक्शी नु मोआब रे आ रागी लेत्चा चिकता बाक्त। मारदे हना मोआब रागीम बाक्सेनु, नाओमीमी “परमप्रभु यावेम आ मुर आन कली मिम्शा, मेको आन कली जचा गेपु” देशो लोव्र नेना बाक्त। *२राजा ८:३* ७मिनु मेको आ चाइमी निक्शी नु आ बाक्तीके रे गाक्शा, यहूदा रागी लमा बाक्त। ८मिनु नाओमीमी आ चाइमी निक्शी आस कली “इस इस माइत लेतीसे। गे दोपा बेक्शो आन कली नु आं कली रिम्शो पसी, मोपा परमप्रभु यावेमी इस कली रिम्शो पवल। ९परमप्रभु यावेमी इस कली अर्को वोंडश गेशा, इस थुं नाइश्शा बाक्चा गेवल” देंमाक्त। मिनु आ चाइमी आस कली पुक्पु पाइश्शा, नेल्ल डाक्मा बाक्त। *रूथ ३:१* १०मिनु आ चाइमी निक्शीमी “गो थमा पा इन मुर आन बाक्तीके लाइनस्कु” देंसा बाक्त। ११मिनु नाओमीमी “आं चाइमी निक्शी लेतीसे। मारदे गो नु लचा दाक्नीसी? मार, गो इस वोंडश दुम्पाइक्चा कली तौ थीने चाप्नुडा डा? १२आं चाइमी निक्शी लेतीस। गो खालपी दुम्शा, ग्युंबे पने मचाप्नुड। गो आल मिम्शा, मुलाक्दोन वोंडश नु बाक्शा, तौ थिती हना यो, मेको

मकोल्म सम्म १३रिम्शा बाक्ने चाप्नीसी? मेको आस कली रिम्शा, अर्को ग्युंबे मपथु बाक्नीसी? मदुम्ब, आं चाइमी निक्शी। मारदे हना इस क्येडा गो परमप्रभु यावे आ गुड रे श्येत जाइब बाक्ती” देंमाक्त। १४मिनु मेकोपुकी लेंशा डाक्मा बाक्त। मेको नोले ओरपामी आ शिमी कली पुक्पु पाइश्शा वोइश्शा, आ मुर आन बाक्तीके लेम्माक्त। रूथ चहिं आ शिमी नुन बाक्माक्त।

१५मिनु नाओमीमी “नेनो, इ देउरानी आ मुर आन बाक्तीके नु आ देवी देवताम लेत्त। गे इ देउरानी आ पशो खोदेशो पावो” देंमाक्त। १६मिनु रूथमी “इन कली प्रोंडपाइश्शा, आं कली लेशशा, सोइक्चा कली ढिपी मपाइय्यीनी। गे ते लाइनीनी, गो यो मेकेन लाइनुड। गे ते बाक्नीनी, गो यो मेकेन बाक्नुड। इन मुरपुकी आं मुर दुम्नीम। इन परमप्रभु आं परमप्रभु दुम्ब। १७गे ते बेक्नीनी, गो यो मेकेन बेक्नुड। मिनु मेकेन थिम्चा पुंडसीनुड। गो मबेक्थु इन कली प्रोंडतन्नी हना, परमप्रभु यावेमी सजाइ गेयील” देंमाक्त। १८मिनु नाओमीमी रूथमी आ कली प्रोंडसीन मप्रोंडब, दे तुइश्शा, अरु मारेइ मदेंमाक्त। १९मिनु मेको निम्फा गाक्शा, बेथलेहेम जाक्सा बाक्त। मिनु बेथलेहेम जाक्सानु, सहर डा मुर नेल्लेमी मेको आस पर्बम लोव्र पामे बाक्त। मिनु मीश मुरपुकीमी “मार, एको नाओमीन बाक्बा?” देंमा बाक्त। २०मिनु नाओमीमी “आं कली नाओमी मदेनीन। मारा देनीन। मारदे हना नेल्ल क्येडा सक्ति पाइश्शो परमप्रभु यावेमी आं कली मरिम्शो पाइश्शा, श्येत जपाइक्ती। *नाओमी देशो दारशो रुम्सीब, मारा चहिं कशो रुम्सीब।* २१गो मारेइ मारेइमी

गाप्शा लशो नड। मुल परमप्रभु यावेमी श्येत्थ लेशशा चाक्ती। गे मारदे आं कली नाओमी देंनीनी? नेल्ल सक्ति पाइशशो परमप्रभु यावेमी आं कली दोस गेशा, मरिम्शो पाइक्ती” देंमाक्त।

२२ मोपा नाओमी नु आ चाइमी मोआबी रूथ मोआब रागी रे बेथलेहेम जाक्सा बाक्त। मेको बेथलेहेमम जाक्सानु, क्योव्रज मीशो बाक्माक्त।

रूथ सिला माल्दीशो

२ मिनु नाओमी आ वोंइश एलीमेलेक आ खिं डा शुश शोप पाइशशो नु ठेयब मुर का बाक्माक्त। मेको आ नें बोआज बाक्माक्त। २ मिनु मोआबी रूथमी नाओमी कली “गो रूम लशा, सु सुम आं कली शिशी पाइनीमी, मेको आन नोनोले सिला बाला गुप्दी डा?” देंमाक्त। मिनु आ शिमीमी “दुम्ब, आं चाइमी लावो” देंमाक्त। ३ मिनु रूथ लशा, रिक्ब आन नोनोले सिला बाला गुबा बाक्त। आ जाकदीशशो रू चहिं एलीमेलेक आ खिं डा मुर बोआज आ रू बाक्माक्त। ४ मेना बोआज बेथलेहेम रे जाक्माक्त। मिनु मेकोमी रिक्ब आन कली “परमप्रभु यावे गेपुकी नु बाक्ल” देंमाक्त। मिनु रिक्बपुकीमी यो “परमप्रभु यावेमी इन कली आसीक गेवल” देंमा बाक्त। रूथ १:२ ५ मिनु बोआजमी आ गेय पाइब आन कली कोव्रब कली “एको मीश आल सुम?” दे हिल्लो पवा बाक्त। ६ मिनु मेको गेय पाइब आन कली कोव्रब मुरुमी “एको मोआब रागी रे नाओमी नु जाक्शो मोआबी मीश आल बाक्ब। ७ एकोमी आं कली ‘रिक्ब आन नोनोले मुठा आन नेक्था यो सिला

गुप्चा गेयीनी’ दे पुंडतु। मिनु एको सुनी रे इच्चका ला नाइशशा, सिला गुप्स डा गुप्स बाक्त” देंमाक्त। ८ मिनु बोआजमी रूथ कली “नेनो, गे अरु आन रू सिला गुप्थ मलावो। आं गेय पाइब मीश मुर आन नेक्थान बाक्को। ९ मुरपुकीम ते ते रिक्नीमी, मेके मेके लावो। आं गेय पाइब वोंइश मुर आन कली ‘इ कली मथिचा’ दे माइक्तामी। तूतू दाक्ते हना, वोंइश मुर आन चाक्शो गर डा ब्वाक्कु तूडो” देंमाक्त। १० मिनु रूथ मेको आ डोंइती बाप्शा, मेको कली “गो अर्को रागी डा मुर नड, दे तुइशशा यो मारदे आं कली इश डा शिशी पाइय्यीनी?” देंमाक्त।

व्यवस्था २३:४-६ ११ मिनु बोआजमी “इ वोंइश बेक्म नोले इ शिमी कली दोदेशो रिम्शो पवी, मेको नेल्ल मुरपुकीम आं कली माइक्तीमी। गे इ आम आफ, इ जरमेशो रागी प्रोंइशा, मतुइशशो मुर आंइ बाक्तीके जाक्ते। रूथ १:१६, १७

१२ परमप्रभु यावेमी इ कली रिम्शो पवल। परमप्रभु यावे, इस्राएली आन परमप्रभुम इ कली वारच पवल, दे मेको आ नेक्था जाक्ते। मेकोमी इ माल्शो नेल्ल गेवल” देंमाक्त। भजन संग्रह ३६:८ १३ मिनु रूथमी “प्रभु, इन डोंइती शिशी ताता। गे आं थुं नाइक्पाइक्तीनी। गो इन गेय पाइब मबाक्ती हना यो, गे आं कली रिम्शो लोव्र पाइतीनी” देंमाक्त। १४ मिनु लाम्ज जची ना, बोआजमी मेको कली “एक पिवो। शोब्ले जावो। इ शोब्ले अडगुर शांबुम तेप्तो” देंमाक्त। मिनु रूथ रिक्ब मुर नु निस्से बाक्त। मिनु बोआजमी मेको कली कारशो क्योव्रज गेवा बाक्त। रूथमी रूथ्री सम्म जशा, हेंशा वोदा बाक्त। १५ मिनु मेको बोक्शा,

सिला गुप्थ लमाक्त। बोआजमी आ गेय पाइब वोंइश मुर आन कली “मेको कली मुठा आन नेक्नेक्था यो सिला गुप्चा गेने, महुइक्तीन। १६इक्का बाला तोक्शा गेने। मिनु गुबानु, महुइक्तीन” दे माइक्मी बाक्त। *लेवी १०:६-१०* १७मोपा रूथ नां रिक्चावा सम्म सिला गुम्ना गुम्न बाक्माक्त। मिनु तुबानु, एफाह का क्योव्रज दुम्माक्त। *एफाह का २२ लिटर पुक्तीके खोदेशो बाक्ब।*

१८मिनु मेको कुरशा, सहर जाक्माक्त। आ शिमीमी मिश डा क्योव्रज गुप्शा, चाक्शो तवा बाक्त। मिनु रूथमी आ हेंशो जचा थोव्रक यो गुंडशा, आ शिमी कली गेवा बाक्त। १९मिनु आ शिमीमी “मुलाक्ती सिला गुप्थ ते लवे? इ कली शिशी पाइब मुर आसीक तवल” देंमाक्त। मिनु रूथमी ते सिला गुबा आ शिमी कली शेंदा बाक्त। “मुलाक्ती आं सिला गुप्शो रू डा होव्रप आ नें बोआज बाक्त” देंमाक्त। २०मिनु नाओमीमी आ चाइमी कली “परमप्रभु यावेमी मेको कली आसीक गेवल। मिनु बेक्शो नु ब्रोंइशो मुर आन कली शिशी पचा मप्रोन। मेको मुर इस खाल डा बाक्ब” देंमाक्त। *रूथ ४:४* २१मिनु मोआबी रूथमी “मेकोमी आं कली ‘क्योव्रज नेल्ल ओंइने मथुमु सम्म आं मुरपुकी नु सिला गुप्थ जाक्को’ देंत” देंमाक्त। २२मिनु नाओमीमी “आं चाइमी, मेको आ गेय पाइब मीश मुर नु गाक्चा रिम्शो बाक्ब। इ कली सुइमी अर्को आन रूमी श्येत मगेमेक्ल” देंमाक्त। २३मोपतीके क्योव्रज नु चेरब रिक्ने मनुम्म सम्म, रूथ बोआज आ गेय पाइब मीश मुरपुकी नु सिला गुबा बाक्त। मिनु आ शिमी नु बाक्बाक्माक्त।

रूथमी नाओमी आ लोव्र टिशो

३ मिनु रूथ आ शिमी नाओमीमी “आं चाइमी, इ कली रिम्शो दुम्चा कली इ खिं पशा बाक्शो तचा दाक्नुड। २बोआज इं खाल डा मुर बाक्ब। गे मेको आ गेय पाइब मीश मुरपुकी नु बाक्ते। मुलाक्दो मेकोमी आ क्योव्रज तुप्तीकेम गेय पाइब। ३मोपतीके गे चिक्शा, तेल खेक्शा, रिम्शो वा फेक्शा, क्योव्रज तुप्तीकेम लावो। बोआजम मजवा मतूडा सम्म मतपांडसो। ४मिनु मेको इप्दीमेनु, आ इप्तीके कोव्रशा वोतो। मिनु नोले लशा, आ खोइल गे डा फेक्शो वा हुक्शा गोलो। मिनु गे मार पचा माल्नेवे, मेकोमी इ कली देंब” देंमाक्त। ५मिनु रूथमी “इन देंशो, नेल्ल पाइनुड” देंमाक्त। ६मिनु रूथ क्योव्रज तुप्तीके लशा, आ शिमी आ देंशो खोदेशो पवा बाक्त।

७बोआज जशा, तूशा ग्येरसे बाक्त। मिनु क्योव्रज पुक्तीके आ नोले इप्थ लमाक्त। मिनु रूथ बोआज आ मतुइक्चा डा पा जाक्शा, आ खोइली गे डा वा हुक्शा, गोल्माक्त। ८मिनु नाक्दो उइक्थ दुम्मेनु, बोआज सेंसे बाक्त। मिनु आ खोइल गे मीश मुर का गोल्शो तवा बाक्त। ९मिनु बोआजमी “गे सु नवे?” दे हिल्लो पवा बाक्त। मिनु मेकोमी “गो इन वाइलीम रूथ नड। गे आंइ खाल डा मुर बाक्नीनी, इन वा फेक्तीनी” देंमाक्त। *इजीकीएल १६:८* १०मिनु बोआजमी “परमप्रभु यावेमी इ कली आसीक गेवल। डोंइती पशो क्येडा मुल डा इ पशो रिम्शो बाक्ब। गे क्येट थीब नु मथीब सुइ ठिटा वोंइश मुर आन नोले मखोदी। *रूथ २:११* ११गे महिंथु बाक्को। इ माल्शो गो नेल्ल

पाइनुड। गे रिम्शो मीश मुर बाक्नेवे।
 सहर डा मुर नेल्लेमी तुइशो बाक्नीम।
 १२गो थमा पा इ खाल डा मुर बाक्नुड।
 तन्न आं क्येडा यो नेक्था डा अर्को मुर
 का बाक्ब। १३मुलाक्दो एके बाक्को।
 दीसा सुनी मेको मुरुमी इ नेक्था डा मुर
 आ पचा माल्शो गेय पाइब, मपाप्तु हना,
 परमप्रभु यावे ब्रोंडशा बाक्शो खोदेशो पा,
 गो एको गेय पाइनुड। नां मसोव्रम सम्म
 इपो” देंमाक्त। १४मिनु रूथ नां मसोव्रम
 सम्म इम्माक्त। मिनु रिम्शो पा नां मसोव्रथु
 बोक्माक्त। मिनु बोआजमी “क्योव्रज
 तुप्तीकेमी मीश मुर का बाक्त, दे सुइम
 मतुइक्तमेक्ल। १५इ कुप्नी दाइक्तो”
 देंमाक्त। मिनु रूथमी दाइक्तानु, ६ सेआह
 क्योव्रज गेशा कुरपदा बाक्त। मिनु रूथ
 सहर लेम्माक्त। सेआह का ७ लिटर खोदेशो
 बाक्ब। मिनु ६ पुक्तीके ४२ लिटर कि १० पाथी खोदेशो
 बाक्ब। १६मिनु आ शिमी आ बाक्तीके
 जाक्दीम्मेनु, आ शिमीमी “आं चाइमी,
 मार दुम्मे?” दे हिल्लो पवा बाक्त।
 १७मिनु रूथमी बोआजमी पशो नेल्ल
 शेंशा “मेकोमी आं कली ‘इ शिमी आ
 बाक्तीके श्येतथ मलेतो’ दे आं कली ६
 सेआह क्योव्रज गेती” देंमाक्त। सेआह का ७
 लिटर खोदेशो बाक्ब। १८मिनु नाओमीमी “आं
 चाइमी, एको दोदेशो दुम्बा, मतुइक्ती
 सम्म इ थुं नाइशशा बाक्को। मारदे हना
 मेकोमी मेको गेय मुलाक्तीन मथुमा सम्म
 आ थुं यो नाइक्चा मताइब” देंमाक्त।

बोआजम आ नेक्था डा मुर ग्रुशो

४ मिनु बोआज सहर डा गारो डा
 ठेयब लाप्चोम लशा, मेकेर निशशा
 बाक्माक्त। मिनु याम का नोले रूथ आ
 नेक्था डा मुर जाक्शो तशा, बोआजमी

आ नें थिशा “एके पिशा, निस्सो” दे
 ब्रेत्ता बाक्त। मिनु मेको निस्से बाक्त।
 २मिनु बोआजमी १० जना सहर डा
 खाल्पा आन कली यो तेक्शा “निस्सीने”
 देंमाक्त। मिनु मेकोपुकी निस्समा बाक्त।
 ३मिनु बोआजमी रूथ आ नेक्था डा
 मुर कली “मोआब रागी रे जाक्शो
 नाओमीमी इं लोकब एलीमेलेक आ रू
 लेयचा चिक्शो बाक्ब। ४गो इ कली मो
 देंड, देंशो नड। एको सहर डा मुरपुकी नु
 खाल्पा आन डोंइती गे ग्याप्चा दाक्नेवे
 हना, ग्यापो। ग्याप्चा मदाक्नेवे हना, आं
 कली तुइक्पाइय्यी। मारदे हना इ नेक्था
 डा मुर गो नड” देंमाक्त। मिनु मेको
 मुरुमी “गो ग्याप्नुड” देंमाक्त। लेवी २५:२५;
 येरमीया ३२ ५मिनु बोआजमी “नाओमी
 रे मेको रू ग्यबी नाक्ती, गे बेक्शो मुर
 आ मीश मोआबी रूथ यो ताइनेवे।
 मेको बेक्शो मुर आ नें आ थेरशो रू
 नु लील, दे मो दुम्चा माल्ब” देंमाक्त।
 व्यवस्था २५:५-६ ६मिनु रूथ आ नेक्था डा
 मुरुमी “गो ग्याप्ता हना, आं आंम थेरशो
 रू मरिम्शो दुम्ब। आं पचा माल्शो गेय
 गेन पावो। गो ग्याप्ने मचाप्नुड” देंमाक्त।
 ७इस्राएल रागीमी डोंइती रू ग्याप्मेनु,
 लेयडमेनु, रू डा होव्रप फांडसीमानु, रू
 लेयबमी ग्याप्ब कली आ जुत्ता पुइशशा
 गेचा माल्बाक्माक्त। इस्राएलमी लोव्र
 फाइक्चा मततीके आ पर्बम मोदेशो पचा
 माल्बाक्माक्त। व्यवस्था २५:७-१० ८मिनु
 रूथ आ नेक्था डा मुरुमी बोआज कली
 “गे ग्याम्सो” दे आ जुत्ता पुइशशा गेवा
 बाक्त। ९मिनु बोआजमी खाल्पापुकी
 नु मेकेर बाक्ब मुर आन कली “गो
 एलीमेलेक, माहलोन नु किल्योन आन
 थेरशो रू नेल्ले नाओमी रे ग्याप्ता। गे

मुलाकती सांकछी दुम्तीनी। १० माहलोन आ मीश, मोआबी रूथ यो बेक्शो मुर आ नें, आ थेरशो रू नु लील, दे चाक्ता। मोपा आ लोकब आन दातेमी नु आ जरमेशो बाक्तीकेम आ नें लील, दे मो पाता। गेपुकी मुलाकती सांकछी दुम्तीनी” देमाक्त। ११ मिनु ठेयब लाप्चोम बाक्ब नु खाल्पा नेल्लेमी “गो सांकछी दुम्तक। परमप्रभु यावेम एको इ खिंम जाक्शो मीश मुर कली राहेल नु लेआ खोदेशो सेलल। मेको निक्शीमी इस्राएल आ खिं सेल्लो बाक्ताक्से। बेथलेहेम एफ्राथाहम इ नें ठेयब दुम्ल। १२ तामारम यहूदा रे थिशो पेरेस आ खिं खोदेशो पा, परमप्रभु यावेमी एको ठिटी मीश मुर रे थिशो आलम इ खिं सेलल” देमा बाक्त। उत्पत्ती ३८:२६

बोआजम रूथ कली ग्युंवे पशो

१३ मिनु बोआजमी रूथ चाक्शा, मेको नु बाक्माक्त। मिनु परमप्रभु यावे आ आसीकमी रूथ कोव्रज कुरशा, तौ का थिमाक्त। १४ मिनु मीश मुरपुकीमी नाओमी कली “परमप्रभु यावे ठेयब बाक्ब। मेकोमी इ कली मुल इ खाल डा

मुर नु वोइक्ते। परमप्रभुम इ कली चच का गेते। एको आ नें इस्राएलम ठेयब दुम्ल। १५ एकोमी इ कली मुल नक ब्रांडीक गेशा, खाल्पी दुमेनु, इ कली शुल्ब। मारदे हना ७ जना तौ आन क्येडा इ कली दाक्ब चाइमीमी रिम्शो पशो बाक्ब” देमा बाक्त। १६ मिनु नाओमीमी मेको आल ताक्शा, आ थुकुम वोइश्शा, मेको कली कोव्रब दुम्माक्त। १७ मिनु आ नेक्था डा मीश मुरपुकीमी “नाओमी के चच का दुम्त। गो मेको आ नें ओबेद वोइय्य” देमुमा बाक्त। मेकोन येस्से आ आफ, दाऊद आ बाजे बाक्माक्त।

मत्ती १:५-६; लूका २:३२

दाऊद आ किकी पिपी

१८ पेरेसम हेस्रोन थिमाक्त। १९ हेस्रोनम राम थिमाक्त। राममी अम्मीनादाब थिमाक्त। इतिहास २:६-१५ २० अम्मीनादाबमी नहशोन थिमाक्त। नहशोनमी साल्मोन थिमाक्त। गन्ती १:७ २१ साल्मोनमी बोआज थिमाक्त। बोआजमी ओबेद थिमाक्त। २२ ओबेदमी येस्से थिमाक्त। येस्सेमी दाऊद थिमाक्त। १ सामुएल १:६:१, ११-१३